



6

Niining Leksyona Matun-an Mo Kini

Gipakaon Ni Jesus Ang Lima Ka Libong
mga Tawo

Milakaw si Jesus Ibabaw sa Tubig

Nangita ang mga Katawhan Kang Jesus

Si Jesus ang Tinapay sa Kinabuhi

Ang Mga Pulong sa Kinabuhing Dayon

GIPAKAON NI JESUS ANG LIMA KA LIBONG MGA TAWO

(Basaha ang Juan 6:1-15)

Si Mateo, laing tinun-an ni Jesus, nagsulti kanato ug dugang mahitungod niining milagroha. Si Jesus ug ang Iyang mga tinun-an miadto sa usa ka mamingaw nga dapit aron pagpahilayo gikan sa mga panon sa katawhan. Apan misunod ang mga katawhan Kaniya nga nanagdala sa ilang mga masakiton aron pagaayohon ni Jesus. Naluoy si Jesus sa mga katawhan tungod kay tali-abut na ang kagabhion ug ang tanan gibati na ug kagutom ug walay dapit nga kakuhaan ug pagkaon.

Nagtudlo si Jesus ug daghang mga pagtulon-an pinaagi sa Iyang gibuhat niining tungora. Gipakita Niya kanato nga ang Dios adunay kahingawa alang kanato ug sa atong mga kinahanglan.



Dihay bata nga may lima ka buok nga pan. Kining lima ka buok nga pan ug duha ka gagmayng isda igo ra gayud alang sa usa ka batang gigutom. Apan gipangayo kini sa Ginoo ug ang bata mihatag Kaniya sa tanan. Uban sa panala-

ngin ni Jesus kining diotayng pagkaon nahimong igo alang sa gikinahanglan sa 5,000 ka mga katawhan. Ug ang bata nakakaon usab. Mikaon siya kutob sa iyang gusto. Dili gayud kita maalkanse sa atong gihatag ngadto sa Dios. Nagabalik Siyag hatag sa labaw pa ka daghan kay sa atong gihatag ngadto Kaniya.

Ang pagkaon napilopilo sa maong kadaghanon sa dihang gipasalamatan ni Jesus ang Dios. Samtang magapasalamat kita sa Dios tungod sa gihatag Niya kanato, himoon Niya kining igo alang sa atong mga kinahanglan.

Mitabang usab ang mga tinun-an sa pagbuhat sa maong milagro. Sa dihang gidawat nila ang pinikas-pikas nga tinapay gikan sa mga kamot ni Jesus, mitubo kini ug midaghan aron pagtagbo sa kinahanglan. Ang pulong sa Dios usahay gitawag nga tinapay ug pagkaon. Sa dihang ipakig-ambit ta ang Iyang Pulong ngadto sa uban, ang Dios magapanalangin niini aron makatagbaw sa gigutom nga mga kalag.

Nangalipay ang mga katawhan tungod niini nga milagro. Ang Mesias nga gisaad sa Dios usa ka propeta nga sama kang Moises. Nag-ampo si Moises ug ang Dios naghatag sa katawhan ug pagkaon nga gitawag ug "mana" didto sa kamingawan. Si Jesus usab sa kahibulongang paagi nagpakaon sa dakung panon sa katawhan sa kamingawan. Mao na gayud kini ang Propeta, ang Mesias. Busa buot silang maghimo Kaniya nga Hari.

Apan wala moanhi si Jesus aron sa paggun-ob

sa gobyerno nga Romanhon ug mamahimong pangulo sa Iyang nasud. Mianhi Siya aron sa paggun-ob sa gahum sa sala diha kanila nga buot magakinabuhi sa hustong kinabuhi. Mamahimo Siyang Ginoo ug Hari sa daghang mga kinabuhi apan ang Iyang gingharian espirituhanon, dili politikanhon. Wala makasabut ang mga tawo niini, mao nga mihukom Siya sa pagpalayo gikan kanila.

Buhata Kini

1. Nagpasalamat ka ba sa Dios sa imong kalan-on sa dili ka pa mokaon? -----
----- Kon wala magasugod ba ikaw gikan karon? -----
2. Unsang milagroha ang gibuhat ni Jesus sa 5 ka buok nga tinapay ug duha ka isda nga iya sa bata?
 - . . . a) Naghimo Siyag igong pagkaon alang sa 12 ka mga tinun-an.
 - . . . b) Naghimo Siyag 12 ka mga basket nga puno sa pagkaon.
 - . . . c) Naghimo Siyag pagkaon nga igo sa 5,000 ka mga tawo.
3. Unsa may buot buhaton sa mga tawo human sila pakan-a ni Jesus?
 - . . . a) Maghinulsol sa ilang mga sala ug mamaluwas.
 - . . . b) Magpurongpurong kang Jesus ingon nga hari sa ilang nasud.
 - . . . c) Magdawat kang Jesus ingon nga ilang espirituhanon pangulo

MILAKAW SI JESUS IBABAW SA TUBIG (Basaha ang Juan 6:16-21)

Ang mga tinun-an nanabok sa lanaw sakay sa sakayan paingon sa Galilea. Ug nangahadlok sila tungod kay may bagyo nga miabut ug hapit malunod ang ilang sakayan. Milakaw si Jesus ibabaw sa tubig ug misakay ngadto sa sakayan aron pagluwas kanila. Kinsa ba ang makalakaw sa tubig o makapahunong sa bagyo? Makahimo ba niini ang kasarangang tawo? Makahimo si Jesus sa bisan unsa tungod kay Siya mao man ang Anak sa Dios.

Ang pagsakay ni Jesus sa sakayan sama ra sa pagbaton nato kang Jesus sa atong kinabuhi. Uban Kaniya mahilikay kita gikan sa mga bagyo sa kagubot. Kuhaon Niya ang mga kahadlok ug magahatag kanato sa kalinaw, Si David nga mag-susulat sa mga Awit sa karaang panahon, nag-sulat niini:

Salmo 34:6. Kining kabus nga tawo nagtu-aw, ug gipatalinghugan siya ni Jehova, ug giluw-
was siya gikan sa tanang mga kalisdanan niya.

Buhata Kini

4. Nagaiway ba ang Dios gikan sa mga kahadlok ug nagahatag kanimo sa kalinaw ug nagapagawas kanimo gikan sa mga kalisdanan? Pasalamat Siya niini;

NANGITA ANG MGA KATAWHAN KANG JESUS

(Basaha ang Juan 6 : 22 -24)

Si Jesus inila kaayo, ug tungod niini bisan asa Siya mosunod ang mga katawhan Kaniya. Tungod kay nagahunahuna sila nga si Jesus mao ang matang sa tawo nga ilang gipangita aron himoong hari. Pinaagi sa Iyang kahibulongang gahum mamaayo Niya ang tanang masakiton. Gipakaon Niya ang mga katawhan ug dili na kinahanglan nga motrabaho pa sila!

Niining higayona si Jesus nagpuyo sa siyudad sa Capernaum sakop sa Galilea. Misunod ang daghang panon sa katawhan Kaniya kay buot nilang himoong pangulo si Jesus sa usa ka kapunongan batok sa kagamhanan. Apan wala hatagi ug bili ni Jesus ang ilang gitanyag. Sa wala madugay ang mga kaaway ni Jesus nagpasangil nga Iyang gidasig ang mga katawhan sa pag-alsa batok sa gobyerno. Apan ang tanang katawhan nasayud nga binuang ug dili tinuod ang maong sumbong.

Buhata Kini

5. Diin man nagpuyo si Jesus?

- . . . a) Sa Capernaum nga sakop sa Mi - diterranean.
- . . . b) Sa Capernaum nga sakop sa Gali - lea.
- . . . c) Sa Nasaret.

SI JESUS ANG TINAPAY SA KINABUHI (Basaha ang Juan 6:25-59)

Nagtudlo si Jesus nga ang Dios buot nga ang mga katawhan mosalig Kaniya.

Juan 6:29. Ang ipabuhat sa Dios mao kini, nga kinahanglan mosalig kamo kaniya nga iyang gipadala.

Buot sila nga si Jesus magapakaon kanila ug mana. Gipahibalo sila ni Jesus nga duna siyay labaw pa ka maayong butang kay sa mana; Siya mao ang Tinapay sa Kinabuhi nga gipadala sa Dios gikan sa langit.



Ang ubang mga katawhan nangasuko sa dihang miingon si Jesus nga kinahanglan silang mokaon sa unod ug moinom sa dugo ni Jesus. Nagakahulogan kini nga ang mga katawhan kinahanglan magapasulod kang Jesus sa ilang mga kinabuhi ingon nga nagakaon silag pagkaon alang sa ilang mga lawas. Ang pagkaon naghatag kanila ug maayong panglawas. Apan Siya magahatag kanila ug kinabuhing dayon.

Dihay panahon tapus niini nga si Jesus naghatag sa Iyang mga tinun-an ug tinapay ug vino ug miingon kanila nga kini nagakahulogan sa Iyang lawas ug sa Iyang dugo. Misugo Siya kanila sa paghinumdom sa kamatayon matag panahon nga sila managpangaon sa ingon niini nga paagi. Ug mao nga karon aduna kitay gitawag nga Panihapon sa Ginoo o Balaang Panihapon. Ang pag-apil sa Balaang Panihapon dili makaluwas

ni bisan kinsa. Gani, ang Biblia nagapasidaan sa dili pag-apil sa Balaang Panihapon gawas kon naluwas na ikaw gikan sa sala.

Buhata Kini

6. Sag-uloha ang Juan 6:29.
7. Linyahi ang bersikulo nga labi mong hiangayan gikan sa bersikulo I ngadto sa 59 sa capitulo 6 sa Juan.
8. Unsa may gipasabot ni Jesus sa Iyang pag-ingon, “. . . gawas kon mokaon kamo sa unod sa Anak sa Tawo ug moinom sa iyang dugo, wala kamoy kinabuhi diha kaninyo”?
 - . . . a) Ang katawhan kinahanglan mokaon sa unod gayud ni Jesus.
 - . . . b) Ang katawhan kinahanglan moinom sa tinuod Niyang dugo.
 - . . . c) Ang katawhan kinahanglan mopasulod kang Jesus diha sa ilang mga kinabuhi ingon nga sila naga-kaon ug pagkaon alang sa ilang mga lawas.
9. Unsa may katuyoan sa Balaang Panihapon?
 - . . . a) Aron pagluwas kanato gikan sa sala.
 - . . . b) Aron pagpaila nga sakop kita sa simbahan.
 - . . . c) Aron pagrepresentar sa lawas ug sa dugo ni Jesus ug ang mga magtotoo nagaapil sa Balaang Panihapon aron paghinumdom sa kamatayon ni Jesus.

ANG MGA PULONG SA KINABUHING DAYON

(Basaha ang Juan 6:60-71)



Ang ubang mga katawhan nga misugod pagsunod kang Jesus karon nangahiubos ug mitalikod gikan Kaniya. Busa nangutana si Jesus sa iyang mga tinun-an kon buot ba usab silang mobiya Kaniya. Mitubag si Pedro, “Ginoo kang kinsa man kami moadto?” Ikaw mao ang may mga pulong mahitungod sa kinabuhing dayon.” Gikinahanglan gayud kaayo alang kanato nga atong masabtan ang kamatuoran sa gipamulong ni Pedro.

Kinahanglang modawat kita kang Jesus aron kita makabaton sa kinabuhing dayon, dili kay nakaila lamang Kaniya. Tungod kay mahimo mang makahibalo ka ug daghang butang sa atong pangulo sa nasud apan wala gayud kamo managkaila. Daghang mga katawhan ang nakaila kang Jesus apan wala gayud magadawat kang Jesus ingon nga ilang kaugalingong Manluluwas.

Juan 17:3. Ug ang kinabuhing dayon mao kini ang ilang pagpakaila kanimo nga mao ang bugtong tinuod nga Dios ug kang Jesu-Cristo nga imong pinadala.

Gidawat na ba nimo si Jesus ingon nga imong Manluluwas? Kon wala pa man kinahanglan moampo ka karon dayon ug isugid ang imong mga sala ug hangyoa ang Dios sa pagluwas kani-mo. Ang imong pagsalig kinahanglan dili sa imong mga maayong binuhatan kondili ngadto kang Jesus sa Iyang gibuhat didto sa kalbaryo.

Buhata Kini

10. Sag-uloha ang Juan 17:3
11. Unsa may gisulti ni Pedro
 - . . . a) "Ginoo kang kinsa man kami moadto? Ikaw mao ang may mga pulong sa kinabuhing dayon?"
 - . . . b) "Ginoo, kalisod ba niining sabton?"
 - . . . c) "Ginoo, unsaon man nimo paghatag sa imong unod aron atong kan-on."
12. Unsa may buhaton mo sa imong kaugali-ngon aron mamaluwas ka?
 - . . . a) Kinahanglan toohan mo nga nagpakamatay si Jesus alang kanimo ug dawaton Siya ingon nga imong kaugalingaong Man-luluwas.
 - . . . b) Kinahanglan nakaila ka kang Jesus pinaagi sa mga sulti-sulti sa uban mahitungod Kaniya.
 - . . . c) Kinahanglan daku o maayo ang imong grado niining kurso nga ginatun-an mo.
13. Itandi ang imong mga tubag sa hustong mga tubag nga anaa sa katapusan niining leksyona.
14. Sulati ang imong Rekord sa Estudyante alang sa ika-6 nga leksyon.

Mga Tubag Sa Ika-6 nga Leksyon

Kon duna kay 6 o 7 ka mga hustong tubag, markahi ang imong grado ug labing maayo; kon 5 ra markahi ug maayo. Kon 4, kasarangan. Ug kon kubos sa 4 ang imong hustong tubag, basaha pag-usab ang leksyon.

2. c) Naghimo Siyag pagkaon nga igo ipakaon sa 5,000 ka mga tao
3. b) Magpurongpurong kang Jesus ingon nga hari sa ilang nasud.
5. b) Sa Capernaum nga sakop sa Galilea.
8. c) Ang katawhan kinahanglan mopasulod kang Jesus diha sa ilang mga kinabuhi ingon nga sila nagakaon ug pagkaon alang sa ilang mga lawas.
9. c) Aron pagrepresentar sa lawas ug dugo ni Jesus ug ang mga magtotoo nagaapil sa Balaang Panihapon aron paghinumdom sa kamatayon ni Jesus.
11. a) 'Ginoo kang kinsa man kami moadto? Ikaw mao ang may mga pulong sa kinabuhing dayon.'
12. a) "Kinahanglan toohan mo nga nagpakamatay si Jesus alang kanimo ug dawaton mo Siya ingon nga imong kaugalingong Manluluwas.

Gidaghanon sa Hustong mga Tubag ____
 Grado _____